

Fantom na šulach: „2plus“

Serbska rada so ze žadanjemi Serbskeho šulskeho towarstwa zaběrała

Drježdžany (SN/mb). „Politiske žadanja za serbske šulstwo w Sakskej“ Serbskeho šulskeho towarstwa (SŠT) su wčera na posedženju Rady za serbske naležnosće w krajnym sejmje intensiwnu diskusiju zbudžili. Serbska rada chce hač do kónca wólbneje perody, nazymu, naćisk za wobnowjenje postajenja kultusoweho ministerstwa „wo džěle na serbskich a druhich šulach w němsko-serbskej kónčinje“ z lěta 1992 předpołožiť a je, tak předsyda gremija Marko Suchy, SŠT za „fachowu podpěru“ přeprósyla. Předsydka SŠT Katharina Jurkowa rozložil, zo su wosom dypkow na hłownej zhromadźiznje wobzamknuli, wo tym z nawodami serbskich šulow wuradźowali, doniž njeje Zwjazkowe předsydstwo Domowiny tomu přihłosowało (SN su rozprawjeli).

Najdlěje su wo přenim z tutech dypkow, kotrež městopředsyda towarstwa Beno Hojer předstajil, diskutowali, kiž rěka: „Serbske šule trjebaja wosebity status, wosebje nastupajo personalny kluč

a džělak rjadownjow“, zo njeby hač do 28 šulerjow w rjadowni było. Sabine Friedel, parlamentariska jednaćelka a kublansko-politiska rěčnica frakcije SPD, na to skedźbni, zo so po šulskim zakonju wot standardowych ličbow za „škit serbskeho luda“ wotchileć hodži: „Hdžež je wola, tam je puć.“ Zapósłanc frakcije CDU Marko Šiman poručil, tež kublanišća w ewangeliskich kónčinach, kaž zakładnej šuli w Bošecach a Bukecach, wobkedźbować, kotrež so wědomje wo serbsčinu staraja. Zapósłanča AfD Doreen Schwietzer kritizowaše, zo na Wojerowskej wyšeje šuli ani fakultatiwneho poskitka serbsčiny njeje, byrnjež mjez šulerjemi zajim zwěsćila.

Zo maja serbscy wučerjo na druhich šulach w němskej wučbje wupomhać, je jenož jedna z přičin, zo „njehodži so koncept 2plus zwoprawdźić“, praji Katrin Suchec-Dźišlawkowa, kublanska referentka Domowiny. Radžičelka Diana Šolcina, tež wjednica serbskeje wyšeje šule we Wortklecach, naspomni, zo naprašnik za ewa-

luaciju 2plus mnohich maćernorěčnych staršich a wučerjow narěčał njeje. Scyła Marko Suchy hladajo na realitu so praša: „2plus njedawa. Što potajkim ewaluujemy?“ Šiman zwěsći: „Je grawoćiwje, zo so prawo njedodžerži“ a statne zarjadnistwa nadawk wustawy njezwoprawdžeja. Na prašenje Suheho za prawniskim zakót-wjenjom 2plus skedźbništaj radžičelaj Dawid Statnik a Julian Nyča na přiłohu hodžinskeje tabulki za zakładne šule, za wyše šule pak tajkeje njeje.

Wo wužadanjach dwurěčnosće w šulskej praksy zhonichu přítomni tež wot člonkow předsydstwa SŠT wučerki Aleny Hiccyneje a Diany Wowčerjoweje, wjednicy serbskeje wyšeje šule w Radworju. Zwadny wostawa namjet SŠT, zastup do serbskeho gymnazija čěši sćinić. Jasne jenož běše, štož Nyča reziměrowaše: „Konsekwentneje rěčneje politiky na gymnaziju njeje.“ A Suchy: „Hdyž něchtó po 12. lětniku jenož ‚dobry džeň‘ a ‚božemje‘ móže, je pedagogiski koncept zaprajil.“ ▶ **Přiłopk**

PŘILOPK

Hižo wjele docpěli

*Ze swojimi žadanjemi za polěpšenje serbskeho kublanja je Serbske šulske towarstwo (SŠT) hižo něšto wažne docpěło: Rěčimy wo konkretnych napravach, kaž na přikład založenje serbskeju referatow w LaSuB a kultusowym ministerstwe. A Serbska rada Sakskeje je, nawjazujo na žadanja, sama na daloko sahace namjety pokazala kaž pjenježny bonus za serbsce wuwučowacych, wšako maja wjac džěla hač kolegojo w jednorěčnym swěće. Zdobom bě pytnýc, zo ani zapósłanča SPD ani zapósłanc CDU z namjetom, přistup gymnazijej na bazy rěčnych znajomosćow wobmjezować, zbožownaj nještaj. Šiman (CDU) widzi přerědženje přečiwu wustawje, druhe kriterije hač znakmi zakładneje šule zawješć. Jeho prašenje bě inspirěrowace: Čehodla njeje na serbskej šuli móžno, z najprjedy njeserbowacymi šulerjemi samsne wuslědki docpěć kaž z jendželšćinu, kotruž Němc wot doma sem tež njerěči? Potajkim: Zjawne posedženja serbskeje rady su zajimawe. ■ **Marcel Brauman***